

*Wana wetu na wawe kama miche Waliokua ujanani. Binti zetu kama nguzo za pembeni Zilizopakishwa kwa kupamba bekalu—Zaburi 144:12.*

**T**abia na mienendo ya vijana vina uwezekano mkubwa wa kudhihirishwa katika utu uzima. Unaweza kuukunja mti mchanga karibu katika kila umbo unalochagua na kama ukibaki na kukua kama ulivyoukunja, utakuwa mti uliopindika na utaendelea kubaki katika umbo ulioutengenezea daima. Unaweza ukajaribu kuunyoosha baada ya miaka mingi ya ukuaji, lakini jitihada zako zote zitakuwa ni bure. Daima utakuwa ni mti uliopinda. Hivi ndivyo zilivyo na akili za vijana. Zinapaswa kuelimishwa kwa uangalifu na uzuri utotoni. Wanaweza kulelewa katika mwelekeo sahihi au usio sahihi na katika maisha yao ya baadaye wataifuata njia ambayo walilelewa utotoni. Tabia zilizoundwa ujanani zitakua kwa ukuaji na kuimarika kwa nguvu na kwa ujumla zitakuwa vivyo hivyo zikiendelea tu kuwa imara.

Tunaishi katika zama ambayo karibu kila kitu ni cha bandia. Kuna uthabiti na uimara wa tabia mdogo mno, kwa sababu mafundisho na elimu ya watoto tangu utotoni ni ya juu juu. Tabia zao zimejengwa juu ya mchanga. Kujikana nafsi na kujidhibiti havijaundwa katika tabia zao. Wamelelewa kizembe na kudekezwa mpaka wameharibikiwa wasifanikiwe kufanya cho chote maishani. Kupenda anasa kunatawala akili zao na watoto hubembelezwa na kuingizwa kwenye uharibifu wao. Watoto wafundishwe na kuelimishwa kiasi kwamba watatarajia majaribu na kutumainia kukabiliana matatizo na hatari. Wanapaswa kufundishwa kujitawala wao wenyewe na kushinda vyema matatizo; na ikiwa hawatakimbia hatari kwa makusudi na kujiweka wenyewe katika njia ya majaribu bila sababu; ikiwa wataepuka ushawishi mbaya na jamii mbaya na kisha kulazimishwa bila kuepukika kuwa katika kundi la hatari, watakuwa na nguvu ya tabia ili kusimama kwa ajili ya kanuni iliyo sahihi na zitunzazo, na watatoka katika nguvu za Mungu na maadili yao yasiyo na doa. Ikiwa vijana ambao wamelelewa ipasavyo watamfanya Mungu kuwa tumaini lao, nguvu zao za kimaadili zitastahimili jaribu lenye nguvu zaidi....

Kama wazazi wangeweza kuamshwa ili kutambua wajibu wa kutisha ambao uko juu yao katika kazi ya kuwaelimisha watoto wao, muda wao mwingi ungetolewa kwa maombi na kuepuka maonesho yasiyo ya lazima. Wangetafakari na kusoma na kumwomba Mungu kwa bidii kwa ajili ya hekima na msaada wa Mungu hivyo kuweza kuwalea watoto wao ili waweze kukuza tabia ambazo Mungu atazithibitisha. Wasiwasi wao haungekuwa kujua jinsi watakavyoweza kuwaelimisha watoto wao ili kwamba waweze kusifiwa na kuheshimiwa na ulimwengu, bali jinsi watakavyowaelimisha namna ya kuunda tabia nzuri ambazo Mungu anaweza kuzifurahia (**Testimonies for the Church 3:143-145**).